

Reseña promete anochi di festival Un Canto na nos himno y Bandera, infantil



E festival infantil/hubenil di **Un Canto pa Aruba su Himno y Bandera** a wordo reparti den dos anochi na lugar di tres, cu e prome anochi cu participacion di muchanan di 7 pa 9 aña di edad y di 10 pa 12 aña di edad. E prome anochi tabata tin participacion di un total di 36 mucha cu 16 agrupacion musical cu a toca pa nan.

Aki ta sigui un resumen di e prome anochi cu a cuminsa cu **"Xarienne Lampe"** di categoria 7 pa 9 aña cu musica di **"Poco Loco"**. E danza di **"Xarienne"** a duna un comienzo alegre di e festival.

Cu **"Tipico Savaneta"** den categoria di 10 pa 12 aña, **"Sergio Garcia"** a interpreta su tumba **"un Indjan"**, sigui pa **"Shaylee Croes"** cu **"Grupo Ambiente Familiar"** cu su tumba **"Bin celebra"**. Su articulacion tabata bunita y hopi cla por a scucha cada palabra y e tabata



fuerte pa cay den e promenan, y a bin logra tambe na di 5 lugar den categoria di 7 pa 9 aña.

"Tipico Un famia" a presenta cu **Jean André Dubero** den categoria 10 pa 12 y tabata un bon prospecto pero no a logra puntonan necesario. Den e cancion **"Mi dushi Tera"** mi a gusta e guitarra su acompañamento den e tipico.

"Banda Un famia" a presenta seguidamente cu e cantante **"Rowin Kock"** den e mes categoria, cu e wals **"Un curazon chikito"**. Mi a gusta con el a mantene su ritmo y e compas cantando hopi bon y cu un cancion bunita. **Rowin** a bin termina na 4 lugar den categoria di 7 pa 9 aña.

"Xenon Fernandez Orfao" den 10 a 12 aña tambe a presenta cu e banda aki cu e danza **"Felicidad Arubiano"**. E no a logra pero mester sigui tene cuenta cune pa futuro. **Jadiene Croes** den e mes categoria y cu e mes banda tabata hopi bon y finalmente a bin gana tambe cu su wals **"Mi stima Aruba"**.

"Rakesh Persaud" tabata e ultimo cantante cu Banda Un Famia den 10 a 12 aña y el a canta e danza **"Canta mi Pueblo"**. E tabata tin tambe bon presentacion pero no a logra suficiente punto pa premiacion.

E prome cantante cu **"Tipico Alegre Kadushi Largo"**, tabata di cate-

goria 7 pa 9 aña **"Deevah Croes"** cu a presenta e tumba 40-30. E no a cay den premiacion pero tabata un presencia bunita riba stage cu presentacion di su tumba. Den e mes categoria a presenta **Jayden Thijsen** cu su tumba **"Ta caya nos ta bay compai"**. E tabata fuerte pero no a logra e puntonan necesario pa gana premio. **Isabella Diaz Ponson** di 10 a 12 aña a presenta seguidamente su was **"Un simpel arubiano"** y tabata candidata fuerte pa premio y a logra tambe di 5 lugar

"Zenon Daal" cu su danza **"Piscador"** tambe a demostra cu como un di e favoritonan e tin cu mantene su imagen di popularidad den e categoria nobo p'e tambe y a bin logra di dos lugar tambe den categoria di 10 pa 12. Su composicion tabata formidable y a resulta despues cu tabata di **Laurena Schwengle**. Mi lo bin despues riba e letranan aki. **Zenon** a termina na di dos lugar den e categoria ak tras di **"Jadiene Croes."**

Tipico Katatumbo tabata di seis agrupacion cu a presenta su cantantenan y a cuminsa cu **"Mia McCollum"** di 7 pa 9 aña cu e wals **"M Aruba"**. **Mia** tabata tin un bunita presentacion di su cancion, y mi no por keda sin menciona e bunita cu e tabata bisti un biaha mas. Na fin a resulta cu **Mia** a termina na di tres lugar den su categoria. Den categoria di 10 pa 12 aña **Yeralvienne Vrolijk** a presenta su wals **"Honora nos bandera"** y no a clasifica pa premio. Mescos tabata cu **Asia Libiee** cu su danza **"Colonan di mi isla"**. El a canta hopi bunita wanta su ritmo y compas perfecto, su articulacion tabata hopi bon y su voz tambe tabata precioso. E tambe a presenta cu nechi trahe. E tabata prospecto pa premio y no a logra cay den e cinconan cu suficiente punto. E di dos anochi e tabata tin e warmup song di e banda.

"Alma Folklorico" a subi cu 5 cantante cuminsando cu **"Kimmylienne Maduro"** cu e **Mazurca-wals "Nos plaza libertador! Plaza d libertad"** den categoria di 7 pa 9 aña. Di ora cu el a cuminsa reson-



su tononan di e cancion, scuchando su voz, mi a bisa cu mester tene cuenta cu e mucha aki. E tin hopi aden y por yega leu. Otro tambe cu mester tene cuenta cu ne ta **"Nyella Thijsen"** cu a sigui den mes categoria cu **"Den cunucu nos tey celebra"**. Mi a gusta con **"Nyella"** tabata gosa di su cancion y con el a move riba ritmo di su danza. E tambe a mostra fuerte pero no a logra suficiente punto.

Den e mes categoria di 7 pa 9 a presenta tambe **"Jeshua McCollum"** cu e wals **"Aruba mi patria stima"**. Mi a ripara cu e **"galan"** hober aki su voz ta desaroyando pa lo mihor cu cada presentacion di dje y e tambe ta un di esnan cu lo bay conta den favoritonan den futuro.

Den categoria di 10 pa 12 aña a sigui **"Jorzinho Schlipken Croes"** cu wals **"Muchanan no lubida"**. E no a clasifica pa premiacion, pero sigur no a keda leu di esaki y pa otro biaha of den otro festival, sigur por bini mas fuerte.

Un debut cu mi a gusta e anochi aki tabata tambe di **"Thyrene Kock"** di categoria 10 pa 12 aña cu e wals **"Esaki ta mi bandera"**. Thyrene tin un voz masha bunita y e wals cu el a presenta tambe tabata hopi bunita sinembargo no a logra e puntonan necesario pa premiacion.

Cantante 21 di e anochi tabata **"Lucas Geerman Jr"** cu e banda **"Balchi y su saus crioyo"**. Su cancion tabata e tumba **"Ban nos canta p'e"**. E no a logra tampoco den su categoria di 7 pa 9 aña. Otro cu no a logra den su debut tabata **Zoe Boekhoudt** cu e wals **"Futuro"** acompaña pa **"Grupo Sparkle"**. El a haci un bon esfuerzo si, mescos cu Lucas.

Grupo **"Fuente"** a presenta cu **Elysha Figaroa** den categoria di 7 pa 9 aña. Por a ripara den e danza e estilo di su compositor **Susjaira** di grupo **"Fuente"**. Elysha no a logra puntonan necesario.

"Melodia" a presenta seguidamente dos cantante di 10 pa 12 aña, **"Dyantha Erasmus y Raydrick Hernandez"**. E prome a canta un wals-danza **"E shoco sabi"** y e di dos un danza, **"Piscador"**. Dyantha tabata tin tur cos aden pa por termina entre e prome 5 nan, pero na final a resulta cu e no a logra. Pero **"Raydrick"** si cu su **"piscador"** a termina na di 4 lugar.

Tipico Muchanan di Mama Rosa a sigui como di 13 grupo musical acompaña 4 cantante. E prome tabata **Lendon Albus** di 7 pa 9 aña cu e danza **"Cunucu di Lendon"**. Lendon a presenta manera un veterano di escenario y a hala hopi atencion sinembargo no a cay den premiacion. Despues a sigui **Emali Wever** den mes categoria cu su danza **"Dia mi bira grandi"**. E hobencito aki a demostra cu e no tin solamente curpa grandi pero ta un prospecto pa bira grandi "dia e bira grandi". Den categoria di 1 pa 12 aña a canta **Zilah Ruiz** presentando e wals **"E historia di mi tera"**. E tambe a demostra cu su periodo di sobresali den premiacionnan ta yegando, y e ultimo cantante **"Ebriahy Wever"** tabata esun mas cerca di premiacion pero no a logra.

Tipico Talentoso a presenta cu **Caylee Hooker** den 7 pa 9 aña. E hobencita aki a haci tur esfuerzo cu su danza **"E paraíso di mi cura-**



zon", sinembargo su puntuacionnan no tabata suficiente pa un di e prome cinco puestonan. E ta si un cantante cu mester tene na bista. **Sendy Loefstop** den 10 pa 12 aña ta veterano di escenario caba y a demostra esaki un biaha mas cu su tumba **"Nos tur ta bon bini"**. El a pega su tumba cu un presentacion perfecto y cu hopi briyo y tabata bon prepara pa e

cambionan cu e cancion tabata tin den dje. No djis un composicion pero e hoben tin un memoria sublime pa por a corda tur locual tin riba e dos papelnan di e composicion largo. **"Sendy"** tabata un di e favoritonan for di e momento ey y a bin termina finalmente na di 3 lugar.

Cu e grupo **G.I.G. (God Inspired Group)** e cantante **Genevan Maduro** a presenta den categoria di 7 pa 9 aña e danza **"E bus cultural"**. Cu su briyo y presentacion formidable e hoben aki a **"swing"** e anochi y finalmente a resulta tambe ganador den su categoria.

Rincon Boyz a acompaña e ultimo 4 cantantenan di e anochi cu a dura 6 ora. **Ruzette Dortalina** den categoria di 10 pa 12 a habri cu tumba **"Ban canta p'e"** cu aunke e no a gana tabata tin un **"kick"** cune. **Quanisha Sampson** cu su tumba di 7 pa 9 aña, **"Ban Proteh'e"** a bin pa gana. El a presenta manera un veterano di stage y cu e zwaai y yanga di tumba pidiendo na final compañami y **"bin yudami proteh'e"**. **Quanisha** a termina na di dos lugar tras di **Genevan**.

Zedayne Gomes y Juean Orman a cera e anochi cu un danza y un tumba den categoria di 10 a 12 aña.

Zedayne a canta e danza **"Aruba ta Celebra"** y **Juean Orman** e tumba **"Ban Celebra"**. Di e dos nan aki **Juean** a resulta esun mas fuerte pa acumulacion di puno y sigur no a keda leu di premiacion cu su presentacion.

Den edicion di mañan mi ta spera di bin cu un reseña tocante e di dos anochi di e muchanan den e festival.

Juby Naar



Ganadornan Festival Un Canto na nos himno y bandera, categoria 4-6 y 13 pa 17 aña



ORANJESTAD(AAN)-- Riba e fotonan aki por mira e ganadornan di festival infantil 4 pa 6 aña, Ezahayra Artage cu Tipico Savaneta a gana cu e wals "Mi pida tera", di Compositor y areglista Ivanuar van der Linde. Di 2 lugar: Ashwin Maduro cu Tipico Alegre Kadushi

Largo

cu e danza "Nos te'i Keiro den Parke Arikok", di Compositor Danilo Vrolijk, y areglista Tico Kelly. Na di 3 lugar: Zina Richardson cu Melodia cu e cancion wals "Nos Placa" di Compositor y areglista Rubin Ponson.

Den categoria di 13 pa 17 aña ganador a resulta :Zaina Falconi cu- Tipico Savaneta cu e wals "Bo No Lo Perdemi Nunca", di Compositor Jaderick Croes y Areglista Franklin Falconi Jr.

Na di 2 lugar: Mary-Jane Vrolijk cu Tipico Katatumbo cu e tumba "Orguyoso di Aruba" di Compositor Chendell Beaumont y Areglista Danny Koolman.



Na di 3 lugar: Zhaisky Kock cu Banda Un Famia, cu e tumba "Libertad, Libertad", di Compositor Frenk Kock, y areglista Ronwayne Kock y na di 4 lugar: Priscilla Quant cu Alma Folklorico cu e wals "A Bira Tempo" di Compositor Danilo Vrolijk, y areglista Micheal Odor y na di 5 lugar Kayla Villasmil cu Melodia cu e tumba "Sabor Arubiano" di compositor Luanne, Kayla y Armando Villasmil, y areglistanan Armando y Mandy Villasmil.